

# Rinforzar l'identitad pluriculturala da la Svizra

Ina activitad da l'Università della Svizzera italiana USI

■ (cp) Per rinforzar l'identitad pluriculturala svizra beneventa l'Università della Svizzera italiana (USI) dals 9 fin ils 27 da fanadur 31 giuvenils tranter 15 e 20 onns. Els derivan dals chantuns da Berna, Friburg, Genevra, Giura, Grischun, Soloturn, Turitg, Vad e Vallais ed han la chaschun d'emprender d'enconuscher meglier la lingua e cultura da la Svizra taliana.

Malgrà che questa idea è naschida già avant, resguarda ella bain ils intents dal forum a favur dal talian che la regenza tessinaisa ha proponì la mesemna passada. L'USI vegn a participar cun plaschair a quest forum.

Tenor *Susanne Stigen Pescia*, la manadra dals curs da talian che l'USI porscha dapi onns a students e professurs che na discurren betg talian, duain quests emprims segiurns linguistics per gimnasiasts da l'autra vart da las Alps dar la pussaivladad da «sa scuntrar, emprender d'enconuscher e reunir las differenzas». La damaun vegnan purschidas al Campus di Lugano lecziuns davart la lingua e la cultura ed il suentermezdi han lieu excursiuns e lavuratori. Las activitads extrascolasticas èn vegnidas planisadas ensem cun il servetsch da sport USI-Supsi ed il Departament per giuvenils ed events da Lugano.

L'iniziativa è naschida da la collavuraziun già consolidada tranter l'USI e l'Associazione svizra dals professers da talian (Aspi), pli precis da l'idea da *Nicole Bandon*, coordinatura dal project per l'USI e da *Sonia Ehnimb-Bertini*, docenta a la scola chantunala Limmattal ad Urdorf (Turitg). Il project ha pudì vegnir realisà grazia a l'engaschi da 50 ulteriurs professers da talian che instrueschan en gimnasis da la Svizra romanda e tudestga e grazia a las famiglias tessinaisas (chattadas cun l'agid dals gimnasis da Lugano) che dattan albiert als giuvenils.



Actualmain nizzegian 31 giuvenils tranter 15 e 20 onns la chaschun d'emprender d'enconuscher meglier la lingua e cultura da la Svizra taliana a l'Università della Svizzera italiana a Lugano.

MAD

## L'USI ed il rinforzament da l'identitad pluriculturala da la Svizra

Cun ils segiurns linguistics s'engascha l'USI per la protecciun dal pluralissem cultural naziunal e per la promoziun dal talian en Svizra. Quest engaschi ha il president da l'USI, *Piero Marinoli*, definì sco «obligaziun moralà per mantegnair il plaschair da l'unitad en la diversità – quai ch'è caracteristic per la Svizra».

L'USI, la suletta università da lingua taliana en Svizra, ha fundà il 2007 l'Insti-

tut da studis talians (ISI) che promova retschertgas e numerusas activitads culturals concernent la lingua, la litteratura e la cultura taliana e ch'è responsabel per trais direcziuns da studi en italianistica e humanitates: in master, in doctorat ed il nov bachelor en lingua, litteratura e cultura taliana che cumenza il settember.

En pli beneventa l'università mintga onn numerusas persunas da lingua estra. A quellas porscha ella in impurtant program da curs da talian. Il 2011 ha la Cu-

missiun europeica decidì da sustegnair l'USI sco partenaria per la promoziun dal talian e finanziescha perquai ils curs intensivs da talian (Erasmus Intensive Language Courses EILC) che pon far ils students che fan part dal program da bachelar Erasmus.

Ils giuvenils che sa participeschan al segiurn raquintan da lur experientschas a las 10.00 en l'aula 321 dal Campus di Lugano e durant ina da las activitads dal suentermezdi.